

續修盧氏縣誌序

古莘處豫省西陲水秀山靈聞人輩出予
猗光緒辛巳司鐸斯邦屢欲借閱誌書以
窺邑中之名勝而編殘簡斷完璧無存蓋
自乾隆戊辰以迄於今一百四十餘年舊
乘之失傳者久矣去歲韓紫垣明府思為
重修之舉令及門諸生極力採訪乃未及
歲事作記玉樓其嗣君整理遺書又並携
草藁以去幸

霖翁郭老父台以今春三月接鈐視事念
前任之未畢厥志也重新採輯歷數月而
成編予因分任校仇熊洛之所鍾毓得以
備覽竊嘆政治之得失彰人文之盛衰見
民物之利病昭上足以備採於輶軒下可
以垂型於里巷美哉斯舉非直盧民感戴
不能忘韓公有靈冥冥中當亦有深為首
肯者矣且盧誌之修已三次惟最後襄事
之人若莫曜孫朋從兩孝廉靳維新王之

壁兩副貢賈來宣周肇基兩歲選與廩生
劉用羽馮世倬增生張恕監生王桂等名
尚可稽前此則編訂者何人分修者某氏
風流雲散渺矣無傳茲值將付棗梨諸凡
更始因為述其大畧亦不没人善之意云
爾

光緒十八年壬辰嘉平月教諭劉棟樑題
於苜蓿齋

續修盧氏縣誌敘

康熙壬寅邑令任允升始創修盧氏誌謝
令修從重修於康熙甲戌李令建中重修
於乾隆丁卯前後未及百年經營業已三
次而風流雲散缺畧仍多迄於今又一百
四十四年矣烽煙屢起飢饉荐臻欲令考
載徵文補苴罅漏恐用力多而成功少難
莫難於此也余自下車伊始時以修舉廢
墜為心維書院之興為急邑乘一書尚有

志而未逮然上欲備廊廟輜軒之採下欲
悉民生利病之源非於舊誌增加之將年
湮代遠聞見日稀事實所存草木同朽未
免蹈固陋之譏且耕莘古地熊洛鍾靈生
其間者往往多奇人傑士而官師之仁心
善政歷代尤卓有可傳向令明季以前舊
乘仍在取而讀之當更為土地人民生色
不僅如任謝李三君所誌云云也惜乎求
之而不可得即三君所誌板亦燬於賊氛

所餘斷簡殘編字跡幾沒滅不可識則今日之續修其得已乎哉夫各邑誌書體例不同而要以若網在綱有條不紊為可貴前令李君重輯時蒙州憲蘭陵龔公發付洛陽縣誌全部復頒道憲京江張公誌規八則其法甚為簡明茲為續修之計仍各歸各門不復另發凡起例存舊續式先型也但綜古核今宜具卓識廣採約取宜具精心予以案牘間冀成盛舉貽譏蚊負所

不遑辭惟望二三同志闕疑殆去偏私頌
長吏勿諛傳先達勿侈紀名勝勿煩瑣據
文詞勿浮蕪分星野考因革勿混淆傳會
褒貶務存公道竄改勿任潛加庶幾為一
邑之成書即可為百年之信史循名責寔
繆妄胥捐是則區區之所日夜圖維而不
少寬假者也事經十旬規模粗定至各鄉
採訪別有見聞倘蒙陸續送局以備彙登
余尤有厚幸焉爰撮其大畧為之敘

光緒十七年南宮紫垣氏韓矩撰於藥州
官廨

盧氏縣舊誌李序

蓋物以積久而盛事以厯久而傳世際昇
隆當重熙累洽之餘其溉培涵育者既深
則披拂發揚者益茂物華滋而生事繁凡
在郡國筆而紀之各彙成書昭示來茲以
著盛美之休為太平之潤色即下邑未吏
固罔敢以因陋就簡從事也則近日之誌
是已夫郡邑之有誌非徒辨疆域攷山川
也凡兵農禮樂胥於是乎記而物產有豐

耗人事有興廢政治有得失風俗有澆純
消長異時今昔異勢將使牧其土者酌量
於升降之際變通乎神明之間則惟誌之
明備徵信展卷厯厯而後四郊情狀畢萃
庭墀萬姓隱瘼籌諸掌握是誌之當續修
也所係豈淺鮮哉盧自前季寇亂數遭兵
火不特人煙息絕即斷簡殘編亦成煨燼
以故舊誌無存迨

國朝蕩平區宇康熙元年任令首事纂修文

猷無稽寥寥荒葺至二十三年謝令因復
續修虽是時承平已五十年瘡痍既起而
撰綴較增搜羅仍缺迄今又五十餘年矣
皇上續承休緒恢

列聖之宏模邁百年之景運堪思汪濊厚德弥綸
凡山陬海澨民樂其業官守其箴綱舉目
張型仁興讓則物產有豐而無耗也人事
有興而無廢也政治美而風俗純也太和
之氣翔洽中天履其盛者將大書特書而

不一書也於是統誌既已刊布而郡邑誌冊亦俱奉

檄纂修余粵西下士任盧半載值此重委夙夜凜惶念盧之舊誌既已灰滅前虽兩加修補絕未詳備今縱欲收集遺亡而自維寡陋每悵靡及幸

道憲京江張公

州憲蘭陵龔公皆推博物宏覽學老文鉅預發誌規典型足式余因敦聘明經秉筆並

設館餽延邑之紳士廣為捃摭而邑人生當

盛世霑濡洪深又

各憲勤宣德意與之休息故閭閻皆得寬然有餘俯仰伏樂逢此鉅典恣思表暴幽隱增美粉榆競出藏冊投供採擇或履陟陟岩墟莽殘碣間苟有昔賢遺跡亦必拂拭而出之共耀光明日積遂多猶不敢妄為臆入務求謹若不支不漏與

憲規允合然後登冊三月完稿迺呈

憲裁其亦幾經詳慎矣蓋邦紀既修則治体
乃立往跡燦著而藉鏡有資後之覽者其
於物產人事政治風俗之際所以驗豐耗
覘興廢考得失徵純澆按藉而稽固不啻
燭照而數計也夫廬當省之西陲僻處深
山民生不見外事樸厚純良上而荷
聖朝之長養下而感

各憲之撫循從風向化在在可誌且能於文

湮獻替之後羣才合志共探幽隱成一邑之典章佐太平之官祀孰非

聖世功德之隆積累之久以馴致於斯與則誌之成也末吏亦幸遭昇隆之慶藉手以殫厥心焉已矣

乾隆十二年五月下浣知盧氏縣陸川李炘撰

盧氏縣舊誌謝序

邑令謝廷爵曰郡邑之有誌猶國家之有